

嶺南叢述卷四

東莞 鄧 淳 粹如編輯

香山 黃培芳 子實叅訂

輿地下

陳村

順德有水鄉曰陳村周迴四十餘里涌水通潮縱橫曲折無有一園林不到夾岸多水松大者合抱枝幹低垂時有綠煙鬱勃而出橋梁長短不一處處相通舟入者咫尺迷路以為是也而已隔花林數重矣居人多以種龍眼為業彌望無際約有數十萬株荔支柑橙諸果居其三四比屋皆焙取荔支龍眼為貨以致末富又嘗擔負諸種花木分販之近者數十里遠者二三百里他處欲種花木及荔支龍眼橄欖之屬率就陳村買秧又必使其人手種博接其樹乃生且茂其法甚秘故廣州場師以陳村人為最又其水雖

嶺南叢述

卷四

輿地

通海潮而味淡有力紹興人以為似鑑湖之水也移家就之取作高頭豆酒歲售可數萬甕他處酤家亦率來取水以舟載之而歸予嘗號其水曰釀溪有口號云龍眼離支十萬株清溪幾道繞菰蒲浙東釀酒人爭至此水皆言似鑑湖又云漁舟曲折只穿花溪上人多種樹家風土更饒南北估荔支龍眼致豪華

鄧公墳

順德縣二十里冲窠村有鄧公墳係宋末廬陵鄧光薦隱居余按邑志載孝廉黃朝賓考古迹云光薦自鹵渡嶺及廣陷避地深山適強寇至妻子匿暗室寇無覩焚居十二口同時死光薦隨駕至厓山除禮部侍郎厓山潰光薦赴海鹵拔而出之止言渡嶺不詳何處所謂深山乃香山之黃楊也只按冲窠去厓山不百里香山黃楊去厓山亦不相上下光薦可至黃楊亦何不可至冲窠其古跡或然也余又讀輟耕錄云鄧光薦先生諱剡號中齋廬陵人宋

亡以義行著其所賦鴈鵠詩曰行不得也哥哥瘦妻弱子羸特隨
天長地闊多網羅南音漸少北語多肉飛不起可奈何行不得也
哥哥其意可想矣又有贊文丞相像曰日煌煌今疎星曉寒氣英
英兮晴雷殷山頭碎柱兮壁完血化碧兮心丹鳴呼孰謂斯人不
在世間似此則光薦亦謝羽臯之流也宋亡不從虜寧閩家焚死
兵燹中卽謂冲雀一壙爲首陽山可也田橫海島亦可也

五山志林

菱塘

菱塘之地瀕海凡朝虛夕市販夫販婦各以其所捕海鮮連筐而
至忙家之所有則以錢易之蛋人之所有則以米易予家近市亭
頗得厭飫嘗爲漁者歌云船公上檣望魚船姥下水牽網滿籃白
飯黃花換酒洲邊相餉又云鱸多烏耳蟹盡黃膏香粳換取下爾

春醪

廣語

九曲林

嶺南叢述

卷四

輿地

明宣德年間有樵夫於香山城東三十里緣溪行古木垂蘿轆轤
蔽日路疑若窮前行忽又無際遂從溪口得一山山有小坳鳥道
崎嶇攀援登陟初甚狹纔過峻翳開朗平曠茅屋完整有阡陌桑
麻池沼園囿鷄犬相聞男耕女織其父老嬉遊自得驚問樵夫自
云先世宋末避亂於此具酒食以餉樵夫歸而備述人往相尋今
遂開茅通道云

粵中見聞

都寧寨

都寧山在順德城東北三十里高約十三丈周圍三里下爲龍巖
其西松排嶺又西爲獅嶺珠岡桃峒在其陽羊化石山滴水巖在
其北

廣東輿圖

黃朝賓考古云都寧寨在縣東四十里祥興帝赴海由

義奪港出得趙氏後更名且集千餘眾圖恢復都於由義所居之
西山遂月旦卒由義葬於山北土人呼其地爲都寧言趙王所都
永安寧也

五山志林

中有黃姬洞相傳五代時有黃姬避地於此

方輿紀要

梅花村

梅花村在羅浮山口前對麻姑玉女二峯深竹寒溪一往幽折人多以藝梅為業冬春際以落梅醅酒於村南麻姑酒田賣之酒田屬之麻姑者以麻姑峯在其前也一茅茨有碑曰趙師雄夢處

見聞

梅村

梅村在翁源縣北三十里自梅鎬至越而嶺有梅嶺嶺之上有紅梅驛紅梅村翁源則有梅村是皆鎬之湯沐地也梅村有一巖上隙通明為宋進士梅鼎臣讀書之所乾道乙酉梅氏舉族避寇巖中寇以火煙薰之僅一孕婦以口伏地得不死產子名繼祖實嗣梅氏宣城麻城是其分支蓋梅鎬之後裔云鎬以兵從漢破秦有大功德子孫蕃衍有繇哉

廣語

梅澗

嶺南叢述

卷四

輿地

自乳源治北行出風門度梯上梯下諸嶺磴道嶮巖尺寸斗絕長懸居崖壑之間有出水巖雙橋梅花澗水四處尤險皆在石石之氣使人多力而善鬪跳盪而前無不以一當十以石為盾火為兵雖猛蠻亦畏憚之勿敢與爭子生八九齡即以烏鎗鹿鐵教之發必命中予詩人人持鹿鐵處處見熊伸

廣語

老女橋

甘泉文集載宋貞女吳氏墓表云於呼此鄉俗呼為老女墳而督學蔡公題曰宋貞女吳氏之墓者也貞女名妙靜宋高宗朝進士國子助教南金道遺之女南金無後女許嫁新會李氏子昏期已及所許子由陸來親迎渡龍江水而舟溺死貞女誓不適人以家貲為大石橋五眼用湖石長二丈二尺於李溺死處故後人亦呼老女橋自寧宗嘉定四年以及八年乃成理宗嘉熙二年戊戌刻石記於國明寺後人於橋東西各置男女廟如牛郎織女之相望

然今廢復以田十三頃捨入光孝寺以沙富村地一所爲庄貯所
入取叔南老之次子理宗朝戶部員外郎邦傑後其父年八十而
終鄉人謚曰室隱儒士張世美兩具聞於官官爲石坊復修其墓
以其裔孫吳允宜來請墓表甘泉子曰貞女大節已表表矣且不
言節婦而言貞女何也曰未成其爲婦也未成其爲婦則何以謂
之貞也貞者正也正而固也未成夫婦而固誓不嫁焉夫非所夫
不亦過矣乎甘泉子曰吾近聞羊城南海庠生黃鶴鳴之女淑貞
未適歐指揮鏗鏗死奔其家守喪不嫁異之吾觀古節烈之婦未
之前聞焉今於吳黃兩貞女則然見人心之同然夫世固有夫在
而反目夫朝死而夕爲他人婦者多矣吾尙暇咎人之過中哉今
督學因張世美之舉慨然表章大有助於風化是宜大書出之以
告於世云

五山志林

大埔坪

嶺南叢述

卷四

輿地

四

英德清遠兩縣交聯萬山重疊內有觀音厓巖茶坑獨石等處邃
谷幽崖綿亘百餘里兼又接連花縣廣寧從化長寧諸山洞最爲
險要雍正九年題允於英清交界之大埔坪建城設一捕盜同知
駐劄照州縣例設民壯數十名專司英清花縣從化廣寧長寧六
縣捕務右翼鎮左營撥千總一員領兵三十名防泚

粵中見聞

洗口

自英德南山寺沿城西北行一路清溪細流隨人縈折路皆青石
甃砌泉浸之人家各依小阜以居茅屋周圍有石筍千百叢與古
木長松相亂草柔沙細水影如空薪女露趺亂流爭涉行者莫不
踟躕其際行數十里至洗口山漸平豁湛文簡嘗欲於此立石刻
衡嶽東門以識重遊之路有詩云洗口尋常路口豈知衡嶽東門
洗口爲南楚咽喉湟川桂水之所會宋設浚泚縣於此米芾嘗爲
尉有寶藏二大字刻石在焉自洗口而上皆高灘曲峽直至連州

山水之最勝處也

廣語

虛市

南越志越之市爲虛多在村場先期招集各商或歌舞以來之荆南嶺表皆然類聚柳子厚作童區寄傳云虛所賣之注南越中謂野市曰虛吳賢良曰蓋市之所在有人則滿無人則虛嶺南村市滿時少虛時多謂之爲虛不亦宜乎故峒岷詩云綠荷包飯赴虛人周諫議湛提點廣東刑獄初江湖之民略良人鬻嶺外爲奴婢湛至聽其自陳得男女二千六百餘人還其鄉然販賣已不在虛所矣

黃志

嶺南之市爲虛卽周禮註塵中空地也凡三日百貨一聚聚之時少虛之時多故曰虛東莞則不然若教場墟石龍墟樟樹墟皆有塵肆而亦名虛每日一小聚三日一大聚

嶺海見聞

四市

東粵有四市一曰藥市在羅浮冲虛觀左亦曰洞天藥市有搗藥

嶺南叢述

卷四

輿地

五

會其聲打瑤如鐵杵臼相擊一名紅翠山中視其飛集之所知有靈藥羅浮故多靈藥而以紅翠爲導故亦稱藥師一曰香市在東莞之寮步凡莞香生熟諸品皆聚焉一曰花市在廣州七門所賣止素馨無別花亦猶雒陽但稱牡丹曰花也一曰珠市在廉州城西賣魚橋畔盛平時蚌殼堆積有如玉阜土人多以珠肉餉客雜薑葷食之味甚甘美其細珠若梁粟者亦多實於腹中矣語曰生長海隅食珠衣珠粵東所在頗多難得之貨士大夫踰大庾而南罕有不貪婪喪其所守濠畔之肆佛山澳門之肆其爲靈臺之蝥賊者不可數計

廣語

市橋

市橋在莞治西到涌癸水及南關溪水合流從城濠而出北關巨石爲橋橋列塵肆故曰市橋相傳晉時居人夜聽戶外波濤洶湧檣聲棹歌相和擊汰揚舠徹夜不絕及曉啓戶則簷際皆浮萍潮

痕始知夜來陸地成江河也變幻特異得無以莞傍羅浮此地爲神仙遊戲乎市橋春漲邑中八景之一

嶺海見聞

茶園

嶺南香國以茶園爲大茶園者東莞之會其地若石涌牛眠石馬蹄岡金釵腦金桔嶺諸鄉人多以種香爲業富者千樹貧者亦數百樹香之子香之萌蘖高曾所貽數世益享其利石龍亦邑之一會其地千樹荔千畝潮蔗橘柚蕉柑如之篁村河田甘薯白紫二蔗動連千頃隨其土宜以爲貨多致末富故曰嶺南之俗食香衣果

廣語

仙女橋

去和平縣東北二十里有仙女嶂西南八十里有仙女橋橋之得名以文信國之二女志稱二女避元兵至蘇坑過橋懼爲追者獲牽衣投橋並溺而死衣內有丞相遺謝疊山書顧託其女方知爲嶺南叢述

卷四

輿地

六

丞相女也土人具棺瘞之三角村旗山下元兵至發其墓惟一巨石後人因以名橋正德間副使黃昭記云景炎元年十月公牽師至汀十一月帝次潮明年正月帝在惠之甲子門公奔漳八月李桓追公顛之空坑夫人與二子二女被執送之燕公與一子奔循史之載如此考之文山詩史丙子定娘慧娘以病死於三角村有集杜兩韻以哀之乃知二女之卒在是年冬而被執沒於燕者又二女也康熙間邑令李嬰建二烈女祠龍南令徐上記之云空坑之敗公與長子道生奔循歐陽氏及二子佛生環生等被執北去史不言二女詩序三角村去空坑尙遠二女非執沒於燕者可知公以丙子端宗景炎元年八月敗奔二女之死三角村在是年冬自是支撐尙二年史稱公歸葬母時夫人之喪至自惠州而家傳又言歐陽夫人歛公於燕據二記所稱公之家流離燕粵正邱首之後乃得合并而二女之死於病與死於溺等死耳以烈而仙亦公之慶

流哉

楚庭稗珠

新興村落

新興村落多以雲為名東有雲蓋西南有雲稠正西有雲秋雲蕪西北有雲洞正北有雲座雲吟雲山雲硬東北有雲敏雲河雲禮雲羅雲端右山則有雲斛在縣北十五里高百餘仞巖谷幽深歲旱禱之石中泉出即雨有雲秀在縣東南四十里常有五色雲見有日雲幹在縣西高二百餘仞直如木幹上聳雲霄下有桄榔古寺蓋新興在萬山中其地多雲居人所見無非雲雲之靜者為山山之動者為雲雲與山一也地在中不以山名而多以雲名從其動而能變者也

廣語

湘子橋

潮州東門外濟川橋廣五丈長百八十丈橫跨鱷溪列肆盈焉下橫長木晨夕兩開以通舟楫蓋榷場也俗呼湘子橋八仙之說不

嶺南叢述

卷四

輿地

七

知所自來而潛確類書著之湘子之附會始於西陽雜俎但云姪自江淮來不著其名因染牡丹而開之有雲橫雪擁一聯皆歸朝後事且冬染春開亦非頃刻雜俎但云公之好奇未及於仙道也而太平廣記則云公之甥因及仙道矣至青瑣高議直云韓湘考公藍關詩則貶潮時湘隨行宿增江口又有示湘詩則湘隨公未嘗離左右增江口不知何處而此詩增城博羅志兩收之疑公刺潮往返不由廣州而詩所云三江滅無口者疑即今所謂三河也

楚庭稗珠

珠璣巷

唐時有張昌者南雄敬宗巷孝義門之人其始祖張轍生子興七世同居敬宗寶曆元年朝聞其孝義賜以珠璣條環旌子興因避敬宗謚而改其所居之巷為珠璣巷也祥符亦有珠璣巷今廣州世家巨族多云先世自珠璣巷來或宋南渡時諸朝臣從駕入粵

至止南雄不忘粉榆所自故稱其地為珠璣巷以誌故鄉之思也
粵中見聞

盧村

新興盧村乃六祖生身之所至今屋址不生草木近其居者毛髮
稀禿此地之不幸也廣語

琵琶洲

琵琶洲在郡城東南四十里江中有洲突起高十餘丈上有三阜
形似琵琶明萬曆戊戌光祿卿郭棻寺丞王學會主事楊瑞雲請
於院司卽洲上建九級浮屠屹立海中以壯形勢名曰海鰲塔北
建北帝宮以鎮之旁有海鰲寺羊城古鈔

濶洲

雷州西至海六十里有濶洲太平寰宇記在縣西南二百里海中周七
十餘里舊名大蓬萊內有八村其民專以採藥為業明一統志其洲四

嶺南叢述

卷四

輿地

八

圍皆海中有三池產珠萬曆十七年以珠賊為患增兵戍守方輿紀要
其陽有蛇洋洲與濶洲相對周十里洲有山如蛇故名亦名小蓬

萊一統志

碇洲

碇洲在吳川縣南大海中宋置碇洲砦後名為翔龍縣明洪武六
年楊景破海賊譚南等於此方輿紀要碇洲在吳川縣南一百四十里

屹立海中當南北道乃雷化犬牙相錯處一統志一島可居數千家

廣東輿圖化州東南至碇洲鎮大海二百二十里又有孱州在海中太平

寰宇記景炎二年帝欲往占城不果遂駐碇洲續通鑑綱目

象鼻砂

欽廉海中有砂磧長數百里在欽境烏雷廟前直入大海形若象
鼻故以得名是砂也隱在波中深不數尺海船遇之輒碎去岸數
里其磧乃闊數丈以通風帆不然欽殆不得而水運矣嘗聞之舶

商曰自廣州而東其海易行自廣州而西其海難行自欽廉而西則尤爲難行蓋福建兩浙濱海多港忽遇惡風則急投近港若廣西海岸皆砂土無多港澳暴風卒起無所逃匿至於欽廉之西南海多巨石尤爲難行觀欽之象鼻其端倪已見矣

嶺外代答

撐腰石沙洲

撐腰石沙洲在連平州城南十五里石高數丈臨涯如柱水深無底中一沙洲清澄可鑑科年遇浮水面八閘多雋諺曰水出沙洲鹿鳴呦呦

郝志

紡塲

王文端公真洪武末隨父太守公學郡齋性雖端重而好游賞民有張思惠者以染作馴其衙公喜其朴野每登臨必與之時郡俗村落鹽蛋小民家婦女多於月明中聚紡與男子歌答爲戲凡龍岐二水大英白沙海田諸處俱有之號曰紡塲公爲思惠所導亦

嶺南叢述

卷四

輿地

九

憲游觀因作紡塲賦後公旣顯思惠以解役見公於京師相與作郡東語地黎之談連夜不息詢及塲女舊事兩相於邑發嘆後思惠歸述其事余先祖因小絕寄戲公得詩屢咏而匣之會雙溪於天順末寄邱深庵詩亦咏此事蓋其俗雖經革於正統程守瑩然餘韻猶存至成化中始無矣

瓊州府志

鹽田

粵中鹽田俱於沙坦背風之港夾築一堤堤中爲竇潮水可以出入天雨水淡天晴水鹹潮消則放淡水出潮長則放鹹水入每鹽田五畝以其半分爲四區布以細沙周以溝水是曰沙田日以蠶殼厚水者三而沙田纔不涸澆灌三日沙與鹽相雜乃耙鬆而乾之以置於漏漏在溝之旁長七八尺兩旁有牆高二尺中廣二尺橫以木覆以蒔蕪草漏旁復有溝置鹽沙於蒔蕪上以溝中水再淋之沙沉於底鹽鹵乃流鹵者鹽之精鹵流至一二三丈爲一槽載

之以火照鹵鹵氣衝火火滅乃良投以鷄旦或飯或斷小魚兩截試之皆浮又或杓鹵而置蓮子數枚三浮五沉者淡七八浮者則淳也於是曬之則爲生鹽煮之則爲熟鹽也曬鹽以池池底以石廣丈深三寸天晴瀉鹵於池不及半寸夏秋日盛每池每日成鹽二石餘春冬日微每日成鹽一石餘其浮游於面不雜泥沙色白如雪爲鹽花日烈而鹽始白鹽花乃成歲四十收得生鹽二百石斯上田也鹽田以高者爲上高則潮消先乾其沙易白而計五畝之中有溝有漏有槽有池其空處乃沙田也堤與竇眾人所同槽與池一己所獨鹹水之來從港以入堤從堤以入竇從竇以入溝從溝以入漏從漏以入槽從槽以入池而後成鹽也煮鹽則不用池其釜以竹周以蜃灰塗以泥橫可八尺深半之置於竈背曰簍盤受鹵二十餘石晝夜三四煮之鹽成可得十六石釜竹不焦因鹽與火同類鹽乃水中之火其烟燄所結雨亦不能施焉熟鹽產嶺南叢述

歸德等場成於火煎性柔易融化味鹹而甘便於調和生鹽產淡水等場成於日曬性剛能耐久其味倍鹹食之多力且貧者得鹽難生鹽可以省用九利之南贛人爲醃醬以廣中生鹽謂力氣重於淮鹽一倍也天下人惟鹽丁最苦一丁所治鹽田二三畝春則先修基圍以防潮決決修漏地以待淋鹵次作草寮以覆竈次採薪蒸踰月而後返場朋合五六家爲簍盤一家煮乃及一家秋則朝揚水暴沙暮以人牛耙沙八九日一收淋鹵晴則陽氣升而鹽厚雨則陽氣降沙淡而鹽散半月之功盡廢矣且築田築竈工本繁多其出鹽難行鹽之路又遠不得不賤售於商人也

粵中見聞

洋田

雷州郭外洋田萬頃其土深而潤用力少而收穫多歲登則粒米狼戾否則一郡告饑然洋田中洼海勢高其豐歉每視海岸之修否歲颶風作濤激岸崩鹹潮沉濫潮消鹵發田禾傷敗至於三四

年然後可耕雷州地偏民無生業多半托命於田而虞乾虞溢東洋爲甚東洋田延袤數十里皆資灌溉於羅湖特侶二渠藉捍禦於長堤烏岸修則穰弛則荒固往事之驗也羅湖者西山諸流所匯宋時何戴二太守築堤成湖而開東西二閘引水西流以溉白沙田引水南流以溉東洋田民大獲利歲久湮塞特侶塘廣四十八頃受十二坑之水明時築東南堤開導水南流由土龍大河匯西湖諸水以溉南洋田又開八大渠從渠入大肚河又開二十四小渠以沃海康遂溪東南之田日久湮塞田中不能資水刷鹹半成荒土雍正元年癸卯冬疏復特侶塘雷人賴之

粵中見聞

沙田

廣州邊海諸縣皆有沙田順德新會香山尤多農以二月下旬偕出沙田上結墩墩各有墻柵二重以爲固其田高者牛犁低者以人秧蒔至五月而畢名曰田了始相率還家其備自二月至五月

嶺南叢述

卷四

輿地

十一

謂之一春每一人一春主者以穀償其值七八月時耕者復往沙田塞水或築篋箔腊其魚蝦鱔蛤螺蛭之屬以歸蓋有不可勝食者矣其田皆一熟或種秋分或白露或霜降必兼種之使自八月至十月月月有收其以八九月熟者曰小禾秋分白露霜降等種是也以十月熟者曰大禾赤粘是也沙田鹹鹵之地多種赤粘粒大而色紅黑味不大美亦名大粘皆交趾種也其黃粘花粘惟內地膏腴者多種禾既穫或貯墩中或卽舟載以返盛平時海無寇患耕者不須結墩皆以大船載人牛合數農家居之喪亂後大船爲官府所奪乃始結墩以居自癸巳遷海以來沙田半荒主者賤其值以與佃人佃人耕至三年田熟矣又復荒之而別佃他田以耕蓋以田荒至三年其草大長佃人刈草以售每一日之功可充十日之食又有魚蝦鱔蛤螺蛭之屬生育其中潮長輒塞篋箔取之其利甚饒草之未盡刈者則燔以糞田田得火氣益長苗而田

荒之至三年又復肥沃故佃人每耕之三年必荒之三年不肯爲田主長耕如數納穀此有沙田者之苦也沙田既多荒棄於時者賊虛糧爲累未已而陰以其田賤賃於沙頭有司捕問則里長以沙頭告沙頭乃上限狀於有司請先輸糧而後獲沙頭者何總佃也蓋從田主攬出沙田而分賃與諸佃者也其以沙田爲奇貨五分攬出則取十分於諸佃不俟力耕而已收其利數倍矣此非海濱巨猾不能勝任當盛平時邊海人以沙田而富故買沙田者爭取沙裙以沙裙易生浮沙有以百畝而生至數百畝者今則以沙田爲累半委之於莫可如何者矣○粵之田其瀕海者或數年或數十年輒有浮生勢豪家名爲承餉而影占他人已熟之田爲己物者往往而有是謂占沙秋稼將登則統率打手駕大船列刃張旗以往多所傷殺是謂搶割斯二者大爲民害順德香山爲甚巖野先生嘗請著爲令凡浮生沙渾悉以入官官募民耕種以其租

嶺南叢述

卷四

輿地

十二

爲賑饑餉軍之需如有能清察報聞者與懇田同功此則既絕爭端又資國用誠爲長利之策或曰古時五嶺以南皆大海故地曰南海其後漸爲洲島民亦蕃焉東莞順德香山又爲南海之南洲島日凝與氣俱積流塊所淤往往沙渾漸高植蘆積土數千百畝膏腴可趺而待而農民又輒於田邊築壩以致對岸之田崩沒而流其沙泥至壩以爲浮生以故爭訟日甚有司者每不能平使能於沙田已報稅者按籍給之無籍者卽沒於官召民承買而取其價以供公斯則絕訟之術也

廣語

雄田

南越志交趾田膏腴號雄田

諸集拾遺

駱田

交趾有駱田隨潮水上下

裴淵廣州記

乳田

廣中韶陽屬邑有乳田以地種乳先掘地成窖以粳米粉鋪於窖內以草蓋之用糞壤壅之候雨過氣出則發開而米粉已化成蛹如蟻蟪狀取蛹作汁以米粉潰而蒸成乳食之

朝野遺記

水步

嶺南謂水津爲步

青箱雜記

地火

韶州岑水塲往歲銅發掘地二十餘丈卽見銅今銅益少掘地益深至七八十丈役夫云地中變怪至多有冷烟氣中人卽死役夫掘地而人必以長竹筒端置火先試之如火燄青卽是冷烟氣也急避之勿前乃免有地火自地中出一出數百丈能燎人役夫亟以面合地令火自背而過乃免有臭氣至腥惡人間所無者也忽有異香芬馥亦人間所無者也地中所出沙土運置之穴外爲風所吹卽火起煜煜然

談苑

嶺南叢述

卷四

輿地

十三

地裂

嘉靖二十一年韶城西南隅民蔡臣家忽地裂廣四尺五袤數丈投之以繩深不可測同日去蔡氏數十家爲方氏後園湧土成高阜俄陷爲深坑以火下燭之氣衝上滅火不可照

韶州府志

羊城八景

國朝八景粵秀連峯琶洲砥柱五仙霞洞孤兀禺山鎮海層樓浮邱丹井西樵雲瀑東海魚珠宋朝八景扶胥浴日石門返照海山曉霽珠江秋色菊湖雲影蒲澗濂泉光孝菩提大通烟雨元朝八景扶胥浴日石門返照粵臺秋月白雲晚望大通烟雨蒲澗濂泉景泰僧歸靈洲鼇負明朝八景粵秀松濤穗石洞天番山雲氣藥洲春曉琪林蘇井珠江晴瀾象山樵歌荔灣漁唱

羊城古鈔

嶺南叢述卷四終

